

By	:	DATO' SRI MOHD NAJIB BIN TUN HAJI ABDUL RAZAK PERDANA MENTERI MALAYSIA
Venue	:	Pejabat Perdana Menteri
Date	:	06/01/2014
Title	:	PERHIMPUNAN BULANAN JPM JANUARI 2014

Assalamualaikum warahmatullahi wabarakatuh

Salam sejahtera dan Salam 1Malaysia

Yang Amat Berhormat Timbalan Perdana Menteri

Yang Berhormat Menteri-menteri

Ketua Setiausaha Negara seterusnya semua penjawat-penjawat awam di Jabatan Perdana Menteri.

Alhamdulillah dengan limpah Rahmat Allah S.W.T kita dapat berhimpun pagi ini untuk mengadakan perhimpunan bulanan yang pertama bagi tahun 2014. Saya ingin mengucapkan Selamat Tahun Baru khususnya kepada semua penjawat-penjawat awam dan berharap bahawa kita dapat menambahkan lagi azam dan tekad kita untuk menjadikan tahun 2014 lebih berjaya daripada tahun-tahun sebelum ini.

Tuan-tuan dan puan-puan sekalian,

Jika kita melihat pada senario dunia terutama sekali dalam konteks andaian dalam tahun 2014, kita dapat lihat bahawa kawasan-kawasan tertentu menghadapi masalah ekonomi yang agak kritikal.

Misalnya kawasan Euro Zone. Walaupun krisis yang genting sudah berlalu tetapi negara-negara dalam Euro Zone akan melalui dekad yang mana pertumbuhan ekonomi mereka akan berlaku pada tahap yang sangat rendah. Malah ada yang menyifatkan dekad akan datang ini bagi Eropah sebagai "*Lost Decade*".

Bagi negara Jepun, 20 tahun mereka mengalami ekonomi yang disifatkan sebagai "*stagnating*". Sehingga Perdana Menteri Shinzo Abe dengan "*Abenomics*"nya, melaksanakan program "*reforms*" berdasarkan pada prinsip "*Three Arrows*", baru ada tanda-tanda ekonomi Jepun akan pulih.

Hatta negara Cina sekalipun yang kita anggap sebagai "*the engine of growth*" untuk ekonomi global, tidak mungkin dapat mencapai 9 hingga 10 peratus pertumbuhan setahun, melainkan negara Cina sanggup melakukan perubahan ataupun "*reforms*" yang menyeluruh dalam sistem ekonomi mereka.

Negara-negara BRIC yang disebutkan, iaitu Brazil, Rusia, India dan Cina ataupun "*emerging economies*" juga menghadapi cabaran-cabaran yang agak serius.

Jika kita melihat senario ini, apa sebenarnya faktor yang terbesar sekali. Pada hemat saya, ialah mana negara yang sanggup melakukan “*reforms*” kepada ekonomi mereka. *Reforms* dalam erti kata *structural reform* serta *reforms* dari segi dasar yang lebih tepat dan yang dikemaskini dari semasa ke semasa. Negara itulah yang akan dapat melihat kepada ekonomi mereka yang tumbuh secara mampan. Kalau ini merupakan keadaan yang dihadapi oleh seluruh dunia, tentu sekali Malaysia tidak ada kelainannya.

Kalau kita tidak sanggup melakukan perubahan, *structural reform*, *strategic reform*, kita akan mengalami keadaan di mana ekonomi Malaysia akan tumbuh perlahan dan kita tidak mungkin dapat mencapai kadar pertumbuhan 5 hingga 6 peratus yang dihasratkan oleh kita.

Inilah “*option*” yang ada pada kita. Kita mesti sedar bahawa ini adalah satu keadaan yang dihadapi oleh semua Negara sebab persekitaran ekonominya berubah. Bagi sebuah negara yang ingin menentukan daya saing, kita perlu membuat perubahan dan perubahan ini telah pun kita gariskan dalam agenda dan Dasar Transformasi Negara.

Sebab itu dalam tahun 2014 ini dan tahun-tahun yang akan datang, kita mesti meneruskan Dasar Transformasi Negara kita. Matlamat utama kita ialah untuk mencapai status negara maju dalam tempoh masa yang semakin pendek.

Kita tidak mampu untuk lari dari landasan ini dan perubahan ini perlu kita lakukan mengambil kira juga pandangan dan hasrat kita supaya tidak melaksanakan sesuatu yang membebankan rakyat. Apa juga dasar kita, umpamanya melakukan rasionalisasi subsidi, bukan bererti bahawa kita menghapuskan subsidi secara mengejut. Tidak ada negara di dunia di mana peruntukan pembangunan ialah sebanyak RM49 bilion subsidi dan insentif ialah RM42 bilion. Keadaan ini dalam satu segi mencerminkan kerajaan memang prihatin kepada beban rakyat, tetapi keadaan seperti ini tidak boleh kita teruskan sebab tidak “*sustainable*”.

Cuma cara kita mengurangkan beban ini atau mengurangkan subsidi ini mestilah secara berperingkat-peringkat dan mana yang boleh kita lakukan untuk menolong pelbagai golongan, seperti mereka yang berpendapatan rendah dan sederhana rendah serta penjawat-penjawat awam, kita perlu lakukan dan kita mesti lakukan.

Saya yakin dan percaya kalau ekonomi kita lebih kukuh, hasil negara lebih mantap lagi maka projek pembangunan boleh kita tambah, kemudahan dan segala-gala kebajikan untuk penjawat-penjawat awam dan pelbagai golongan lain boleh dipertimbangkan dari masa ke semasa. Tapi ini semua mestilah berasaskan kepada sebuah ekonomi yang semakin kukuh dan semakin mantap lagi.

Inilah yang saya hendak jelaskan, yakni pendekatan yang perlu kita lakukan untuk tahun 2014. Apa-apa yang telah kita sebutkan termasuk juga Aku Janji kita semasa pilihanraya, hasrat kita untuk menentukan peningkatan kesejahteraan rakyat, ekonomi negara yang tumbuh 5 peratus ataupun lebih setahun dan perubahan-perubahan yang bersifat strategik, umpamanya pembangunan modal insan kita yang merupakan salah satu faktor yang amat penting kalau kita hendak mencapai status negara maju.

Tahun 2014 ini merupakan tahun dimana insya-Allah kita akan laksanakan berdasarkan kepada ketetapan-ketetapan yang telah kita buat.

Dalam pada itu sebagai sebuah negara, kita ini mempunyai banyak keunikan. Tentu sekali perkara yang selalu kita sebut ialah “*multi-culturism*”, “*multi-religious society*” dan “*multi-lingual society*”, ini kekal dalam keadaan yang aman dan harmoni.

Keadaan ini perlu kita beri perhatian supaya tidak ada isu yang berbangkit dari masa ke semasa yang boleh menggugat keadaan yang selama ini kita telah kecapai, yang selama ini Malaysia telah pun terkenal di seluruh dunia.

Bila saya berjumpa dengan pemimpin-pemimpin luar negara, mereka berbangga malah mereka melihat suatu yang agak mereka hairan bagaimana Malaysia boleh mengekalkan keadaan seperti ini, meskipun kita menghadapi keadaan kepelbagaian yang begitu kompleks.

Jadi bila ada sesuatu isu yang berbangkit, kita harus tangannya bukan dengan perasaan dan emosi, tetapi dengan kematangan dan ketenangan berdasarkan pada penyelesaian yakni berasaskan kepada “*rule of law*” dan “*dialogue engagement*” dengan semua pihak. Bila kita boleh duduk semeja, bincang dan cari penyelesaian, saya percaya kita dapat mengurangkan sebarang ketegangan yang boleh timbul atas apa-apa isu yang boleh berbangkit dari masa ke semasa.

Tidak ada gunanya kalau kita berbangga dengan kejayaan kita tetapi salah satu daripada tiang seri negara kita ini kita biarkan hancur lebur. Maknanya segala-galanya yang kita telah bina selama ini tidak membawa erti sama sekali. Saya berharap tahun 2014 ini kita teruskan kejayaan kita, usaha kita. Di samping itu, kita jaga apa yang kita telah kecapai, apa yang telah kita warisi selama ini sebagai satu yang kita letakkan nilai yang cukup tinggi kepadanya.

Selamat menjalankan tugas dan InsyaAllah kita akan terus jadikan negara Malaysia ini lebih berjaya lagi.

Assalamualaikum warahmatullahi wabarakatuh.

https://www.pmo.gov.my/?menu=speech&page=1676&news_id=691&speech_cat=2